



Republika e Kosovës
Republika Kosova – Republic of Kosovo



Komuna e Mitrovicës së Jugut
Opština Juzna Mitrovica – Municipality of Mitrovica South

KUVENDI I KOMUNËS SË MITROVICËS SË JUGUT

Komiteti për Politikë dhe Financa

Nr. 02-060/01-0041977-1/25 dt. 25.07.2025

Mitrovicë

PROCESVERBAL

Nga mbledhja e rregullt e Komitetit për Politikë dhe Financa

Mbledhja e 43-të

Koha: 25.07.2025 ora 10:00
Vendi: Salla e Mediave
Të pranishëm: Kryesuesja e Kuvendit znj. Vesa Broja
Anëtarët e Komitetit për Politikë dhe Financa: Fadil Veseli, Nazmije Sejdiu, Vesel Neziri, Hysen Muzliukaj, Erseka Barani, Muhamed Hoti dhe Xhyljeta Imeri
Nënkryetari i Komunës z. Arian Tahiri
Drejtorët e Drejtorive
Mungoi: Shkurta Shosholli Musa

Mbledhjen e hapi dhe kryesoi Kryesuesja e Kuvendit znj. Vesa Broja e cila theksoi se në zbatim të nenit 52, paragrafi 1, të Ligjit Nr. 03/L-040 Për vetëqeverisjen lokale; nenit 11 paragrafët: 1, 2 edhe 5 të Udhëzimit Administrativ (MAPL) Nr. 05/2020 Për procedurën e themelimit, përbërjen dhe kompetencat e Komiteteve të përhershme dhe komiteteve tjera në komunë; nenit 62, të Statutit të Komunës së Mitrovicës; nenit 15, pika 2, të Rregullores Komunale për punën e komiteteve të Kuvendit të Komunës, për sot ka thirrur mbledhjen e 43-të të Komitetit për Politikë dhe Financa, me këtë:

Rend dite:

1. Miratimi i procesverbalit nga mbledhja e kaluar
2. Raporti financiar për periudhën janar-qershor 2025

Rendi i ditës u miratua unanimisht (8-për, 0-kundër dhe 0-abstenime).

Pika 1

Procesverbali nga mbledhja e kaluar u miratua unanimisht (8-për, 0-kundër dhe 0-abstenime).

Pika 2

Kryesuesja e Kuvendit hapi diskutimin lidhur me Raportin financiar për periudhën janar-qershor 2025.

Fadil Veseli: Përshëndetje për të gjithë të pranishmit! Do të përpiqem të përmend në pika të shkurtra disa specifika nga raporti gjashtëmujor i vitit 2025. Do të fillojmë me të hyrat vetanake sipas tabelës numër 1. Realizimi i të hyrave vetanake për gjashtëmujorin është dy milion e pesëmbëdhjetë mijë e dyqind e shtatëdhjetë e gjashtë euro. Nëse e krahasojmë me planifikimin vjetor, kjo përbën rreth 55.74%. Mirëpo, nëse e ndajmë në dy pjesë, që do të thotë dy këste tremujore, përfshirë gjashtëmujorin, atëherë përqindja e realizimit kalon në 111.47%. Por duhet pasur kujdes, pasi buxheti vjetor është parashikuar në tre milion e gjashtëqind mijë euro, dhe ndarja në dy pjesë tregon se ekzekutimi i mjeteve për gjashtëmujorin është i kënaqshëm. Të hyrat vetanake bazohen në dy kategori kryesore: buxheti dhe financa, që sigurojnë rreth 50% të totalit. Për shembull, Drejtoria për Buxhetin dhe Financat ka grumbulluar shtatëqind e katërdhjetë e tre mijë euro, nga një parashikim vjetor prej një milion e dyqind e shtatëdhjetë e tetë mijë eurosh. Nëse ndahet në dy pjesë, obligimi i ekzekutivit ishte që të realizohen 63,900 euro për gjashtëmujorin e parë, që përkthehet në një realizim prej 100%, ndërsa në planifikimin vjetor është 58% për këtë kategori. Nëse e ndajmë sërish, përqindja shkon në 116.24%, që është rezultat pozitiv. Gjendja është e kënaqshme edhe në sektorin e urbanizmit, i cili ka siguruar për gjashtë muaj 716,762 euro, nga një obligim vjetor prej një milion e pesëqind e tridhjetë e një mijë eurosh. Realizimi i buxhetit në këtë kategori është 46%, por nëse llogaritet sipas obligimeve të vendosura, del në 198.58%. Sa i përket shpenzimeve kapitale, gjendja duket e kënaqshme, megjithatë ekziston një specifikë që na shqetëson. Realizimi i investimeve kapitale nuk ka qenë i plotë, pasi një pjesë e madhe e mjeteve (rreth dy milion e dyqind e njëzet mijë euro) janë në proces ekzekutimi nga qeveria dhe përmbaruesit. Kjo ndikon në përqindjet e realizimit, por megjithatë nuk është gjendje e keqe. Totali i investimeve kapitale është tre milion e tetëqind e nëntëdhjetë e gjashtë mijë euro, ku pjesa e përmbarimit është dy milion e dyqind e njëzet mijë. Një milion e gjashtëqind e shtatëdhjetë e gjashtë mijë janë investime të tjera të realizuara. Nëse i krahasojmë me obligimet e gjashtëmujorit prej shtatë milionë e dyqind mijë eurosh, përqindja e realizimit është 44.57%.

Xhylljeta Imeri: Përshëndetje edhe një herë për të gjithë! Faleminderit për përgatitjen e raportit financiar. Dua të ndalem tek investimet kapitale, që prekin drejtpërdrejt nevojat e qytetarëve në sektorë të ndryshëm. Duke iu referuar tabelës dymbëdhjetë dhe trembëdhjetë, më shqetëson fakti që arsimi parafillor dhe fillor ka zero investime kapitale, gjë që është shumë e keqe. Rreth 52% e investimeve kapitale janë për shkak të heqjes së mjeteve nga përmbaruesi, që do të thotë se projektet në procedurë prokurimi apo kontratat ekzistuese do të bartën obligim për vitin 2026. Fatkeqësisht drejtoresha nuk është këtu, por kam dëgjuar nga zyrtari i lartë i Thesarit se nga gushti në sistemin e menaxhimit të financave do të kërkohet zotim shumëvjeçar për prokurimet, dhe kjo mund të shkaktojë bllokadë. Si e menaxhoni këtë situatë?

Hysen Muzliukaj: I nderuar nënkryetar, kryesuese, kam vërejtur disa pasaktësi në tabelën 1. Krahasimi i inkasimit të të hyrave vetanake me planifikimin sipas drejtorive nuk përputhet me përqindjet që po na i shpjegon z. Fadil. Për shembull, vlera prej 192,554.382 euro nuk korrespondon me përqindjet që paraqiten. Gjithashtu, kemi kërkuar disa herë që listat e pagesave të ekzekutuara sipas procedurave përmbarimore nga Ministria e Financave - Departamenti i Thesarit, të bashkëngjiten me raportin, por kjo nuk është bërë ende. Është koha që kjo të bëhet një praktikë standarde për transparencë.

Erseka Hasani: Faleminderit, Fadil, për raportin financiar në mungesë të drejtoreshës. Dua të ndaj dy shqetësime. Së pari, subvencionet në arsimin parafillor janë vetëm 50 mijë euro, por janë shpenzuar vetëm 2,945 euro në gjashtëmujorin e parë. Kjo është e papranueshme, sidomos duke pasur parasysh se këto mjete janë dedikuar për nxënësit. Së dyti, nga 62 projektet në tabelë, vetëm 17 janë duke u realizuar, 30 janë në procedurë përmbarimore dhe pjesa tjetër nuk ka filluar ende. Kjo situatë është shqetësuese dhe duhet të adresohet me urgjencë.

Vesa Broja: Drejtoresha nuk është këtu, ndoshta nuk ka pasur kërkesa ose ndonjë pagesë ka ndodhur në korrik, prandaj nuk është përfshirë në raport.

Pasi nuk kishte të lajmëruar tjerë për diskutim, Kryesuesja e vuri në votim Raportin financiar për periudhën janar-qershor 2025 me propozimin e z. Muzliukaj që raportit t'i bashkangjitet lista e pagesave të ekzekutuara sipas procedurave përmbarimore nga Ministria e Financave – Departamenti i Thesarit deri më dt. 30.06.2025.

Komiteti për Politikë dhe Financa miraton unanimit (8-për, 0-kundër dhe 0-abstenime) Raportin financiar për periudhën janar-qershor 2025 me propozimin që raportit t'i bashkangjitet lista e pagesave të ekzekutuara sipas procedurave përmbarimore nga Ministria e Financave – Departamenti i Thesarit deri më dt. 30.06.2025 dhe i njëjti i procedohet Kuvendit të Komunës për shqyrtim dhe miratim.

Mbledhja përfundoi punimet në ora 10:45 min.

Mitrovicë

Procesmbajtës:


Merita PRETENI



Kryesuesja e Kuvendit


Vesa BROJA